

Payí Poro Korosi ηweáyí nání eañinarini.

Payí rina Jisasoyá siyikí imónigíá añí yoi Korosi ηweagiáyí nání Poro eañinarini. Añí api Esia piropeniśiyo ikwíróniñagi aiwi Poro xewanijo piropeniśí ayo nemeríná añí apimi memé Epapiraso añí apimi xwiyíá yayí neainariñipi wái uriniri urowaráná e ηweáyí wí Jisasomi diñí wikwírogíawixini. Xwiogwí waú worani, waú waúrani, pwéáná Poro Romiyo gwí ηweañáná Epapiraso niwímeari áwaní réniñí uriñinigini, “Mimóní uréwapiyarigíá wí Korosi nání nuro Jisasoyá siyikí imónigíáyo ikweakwímí imóniñipi nuréwapiyiro re urariñoi, ‘Gorixoyá imónimíániri nisimóniríná Jisasomini diñí niwikwíroríná apánimani. Aiwá ηwíá ηwiráriniro xwiríá imóniro neriñipimi dánini imónipaxírini.’ uriro ‘Gorixomi xómiñí niyikwiri seáyí e numero aiwi aññajíyo eni wí múropaxí mimónini.’ uriro ‘Jisaso Gorixo tñi xixeni imóniñomani.’ uriro nero sekaxí ámi bi tñi bi tñi seáyí e ikwikwarimí wiarinoi.” Áwaní e uríagi Poro Korosi ηweáyí xewwí uréwapiyarigíápi ríwímimi omamópoyiniri payí rina neari Tikikasomi wiowárinigini.

1 1-2 Poroni —Nioni Gorixo nirípeáagi nání Jisasi Kiraisoyá wái wurimeiariníá wonirini. Nioni tñi Timotio —O Kiraisomi xidarínagi nání negí nixímeáñiñí imóniñí worini. O tñi yawawi payí rina Korosi ηweaarigíá Gorixoyá imóniro Kiraiso tñi nawíni ikáriniro egíáyíné —Seyíné nixímeá Kiraisomi pírániñí xidarigíáyínérini. Seyíné nání yawawi payí rina neari mónapariñwii. Yawawi “Negí ápo Gorixo wá seawianiri oyá diñí tñi seyíné niwayiróniro ηweapírí nání seaiiri éwinigini.” yeaimónarini.

“Segí nañí yarigíápi nání Gorixomi yayí wiarigwírini.” uriñí nánirini.

³Seyíné nání yawawi Gorixomi —O negí Áminá Jisasi Kiraisomi xanorini. Omi rixiñí niseauriyirainá íníná yayí wiarigwírini. ⁴Xwiyíá re riníagi aríá niwirane nání, “Korosi ηweáyí Kiraisi Jisasomi diñí niwikwíroro ámá Gorixoyá imónigíá nání nání diñí sipí wiarigíárini.” Xwiyíá e riníagi aríá niwirane nání Gorixomi yayí wiarigwírini. ⁵Seyíné “Añínami dání Gorixo yeáyí neayimixemeaníárini.” niriro diñí ikwímogíápi nání nimoro nání Jisasomi diñí niwikwíroro oyá

ámá nání dñí sípí wiarigíárini. Xámi xwiyía nepaxiñí imóniñípi — Api yayí neainariñí imóniñípirini. Api aría niwiróná “Nepa Gorixo e neaiñíárini.” niyaiwiro dñí ikwímogíápi nání aría wigiárini. ⁶Xwiyía yayí neainariñípi aní nimini aría wigiápa seyíné eni aría wigiárini. Aní nimini ámá xwiyía api aría niwiro nání siwí nañí imóniñípi néra uro Jisasomi dñí wikwíroarigíáyí sayá nimóga uro yarigíápa seyíné iwamíó aría niwiro wá Gorixo nineawianiri neaiñípi nání xixeni nijá imónigíe dání axípi e néra warinói. ⁷Xwiyía yayí neainariñí nioní searariñápi, ayí Epapiraso searéwapiyiniñípirini. O negí dñí sixí uyiñwá worini. Xwiyía Jisaso nání none tñi wáí wurimealaníwá nání gwí móniñwá worini. Seyíné arirá seainía nání Kiraisomi xináñiñí nimóniri yariño anani dñí uñwiráripaxí yariñí worini. ⁸O seyíné kwíyípi seaañiñípiimi dání ámá nání dñí sípí niwiro arirá wiarigíápi nání áwaní yearémeaníriní.

“Seyíné api api epíría nání rixiñí seauriyarigwíriní.” uriñí nánirini.

⁹Seyíné nání áwaní e yearémeaní enagi nání síá iwamíó aría wigwíyí dání pñi wí miwiárí seyíné nání Gorixomi rixiñí niseauriya warigwíriní. Rixiñí niseauriya nuraíñá seyíné ripi ripi oimónípoyniri urarigwíriní. Seyíné ámá Gorixoyáyí e éfrixiniri wimónariñípi nání nijá onimiápi mimóní aga xixeni nimóniróná dñí émfí safmí moro kwíyí oyápi seaañiñípiimi dání “O imóniñípi apírñani?” niyaiwiro siñwí mí wómixipíri nání imóniro oépoyniri urarigwíriní. ¹⁰Seyíné api api nimónimáná ripi ripi epíría nání rixiñí seauriyarigwíriní. Segí pí pí yarigíá nípini nání Gorixo yayí wininía nání Ámináoyá ámá imónigíáyí epaxípi tñi xixeni néra úfrixiniri rixiñí e seauriyarigwíriní. Seyíné ámá seaikwiárinipaxí imóniñí xixegíni epíría nání eni seauriyarigwíriní. Nijá Gorixo nání imónigíápi sayá nimixa upíría nání eni seauriyarigwíriní. ¹¹Seyíné pí pí seaímeááná yayí tñi “Ananirini.” niyaiwiro xwámámí wipíría nání Gorixo xegí ení sixí eáñiñípiimi dání —Api xío nikíniri seáyi e imóniñípirini. Apimi dání ení seaímixinía nání eni rixiñí seauriyarigwíriní. ¹²Ámá ápo Gorixo tñi wía óniñe ñweapíríáyí imónipíríápi seyíné eni axípi e imónipaxí seaimixiñí enagi nání seyíné eni wía xío óniñe ñweapíríárini. Ayináni seyíné omi yayí umepíría nání eni rixiñí seauriyarigwíriní. ¹³O síá yiniñe obomi simañwíyóniñí wurínagwáé dání nineaíkwamixiri xegí xewaxo, dñí sixí uyiñoyá wxioxíyo ñweárixiniri neawáriñíriní. ¹⁴O xegí xewaxo neapeiñípiimi dání ninearoayíroríná negí íwí yariñwápi yokwarimí neaiñíriní.

Kiraiso, niyoni seáyi e wimóniño nání uriñí nánirini.

¹⁵Kiraiso, nene siñwí winiñwáo, o Gorixo, nene siñwí miwinipaxí imóniño nání “E imóniñoñani?” yaiwaníwá nání piaumimí

neainariñirini. Amipí náni Gorixo imixiñipimi seáyi e múroñorini. ¹⁶ Ayí ripi náni “Seáyi e múroñorini.” searariñini. O amipí xwiáyo enjýirani, añinami enjýirani, siñwí winipaxí imóniñipirani, miwinipaxí imóniñipirani, pí pí kwíyí enjé eániro seáyi e imóniro yarigiáyirani, api nipini Gorixo nimixiríná xewaxoyá wéyo dáni imixiñirini. Api nipini nimixiríná oyá wéyo dáni imixiñini maríái, api nipini omi yayí umepíría náni eni imixiñi enjagi náni rariñini. ¹⁷ O amipí sini mimónipa enjimi ñweaagorini. O xegí enjé eániñipimi dáni amipí sini xegí wenjépa weni. ¹⁸ Miñiyimi wará nipini ínimi wuríniñjépa Kiraiso miñiñiñí imóniñjomi xíoyá siyikí imónigiáyí ínimi wuríniñjagía náni seáyi e wimóniñorini. Xegí siyikí imónigiáyó míkí ikiñorini. Amipí nipini náni xiráni xiráni imóníó imóninía náni xwáripáyo dáni niwiápínimearíná óí imomeañorini. ¹⁹ Ayí ripi náni searariñini. Gorixo xewaníño “Nioni imóniñá nipini gí íwomi xe sixí owínini.” wimónáriñi enjagi náni xewaxo xixeni e imóniñirini. ²⁰ Gorixo amipí náni xwíá tíyo enjýirani, añinami enjýirani, amipí náni xegí xewaxo éipimi dáni piyíá wíráriníwaniginiri enjirini. Sipí áamá wikárarigiápi náni xegí xewaxo yoxáfpámi yekwiroáraná xegí ragí púfpimi dáni yíyí xópé níóniñiñí imónimíániri enjirini.

**“Gorixo xío tñni gwiaumí inipaxí imónaníwá
náni neaimixiñirini.” urinjí nánirini.**

²¹ Xámi seyíné diñí sipí moro sipí ero yagiápmi dáni Gorixomi símí tñni wiro o tñni nawíni mimóní xepixepá róniro yagiáyíné enjagi aiwi ²² o xegí xewaxo áamá nimóniri yoxáfpámi penjipimi dáni xío tñni nawíni gwiaumí inipaxí imónipíría náni seaimixiñirini. Xegí siñwí anije dáni éí seauráraná seyíné siyikwí mínigiáyíné imóniro igiániñí eámónigiáyíné imóniro xwiyíá miseaxekwímopaxí imóniro epíría náni e seaimixiñirini. ²³ E searariñagi aí seyíné xwiyíá yayí neainariñipi —Api añí nimini ñweagíáyo rixa wái urimeñwápirini. Poroni eni wái urimemía náni imóniñipirini. Api seyíné aga xaíwí íá nixira uro diñí niwikwíroróná sirí muní ero xwiyíá api iwamíó aríá niwiróná “Neparini. Gorixo nanjé e neaiiníárini.” yaiwigíápi náni sini diñí niwikwímóa uro nerónáyí, Gorixo seyíné rixa siyikwí mínigiáyíné imóniñáná xegí siñwí anije dáni éí seaurariniárini.

“Ríniñí meari wái uriri yariñini.” urinjí nánirini.

²⁴ Seyíné arirá seaiminiri yaríná ríniñí nímeái ripi náni yayí ninarini. Ríniñí Kiraisomi sini miwímeañiñiñí imóniñipi nioni onininiri yariñini. Ayí ripi searariñini. Gorixo ninirípearíná nioni áamá Kiraisoyá siyikí imónigiáyó —Ayí xíoyá waráriníñí imónigiáyirini. Ayo arirá wiminiri yaríná xeaniñí wímeáwiniginiri niriñjépi, api nipini xixeni onímeaniri

yariñini. ²⁵Émá imónigíáyíyá xináñiniñi niwimónimáná wái wurimeimía nání nirípeáagi nání ámá xóyá siyikí imónigíáyíneyá sénáníniniñi nimóniri arirá seaminiri yariñaonirini. Émáýíne xwiýá Gorixoyápi rokwpá seaimía nání e nimóniri yariñaonirini. ²⁶Xwiýá api xámíná dání ámá niñweaxa bagía niyoni ínimi rinárininiñi pi aí agwi ríná ámá Gorixoyá imónigíáyo rixa piaumimí winini. ²⁷Xwiýá ínimi rinárininiñi api —Api “Gorixo émá imónigíáyo nañi ayá wí wimixiyiniñárinini.” rinárininiñipirini. Api nání Gorixo émáýí aí nijía oimónípoyiniri wimóniñirini. Ínimi riniñi api, ayí “Kiraiso seyíne tñi nawíni imóniñoi.” riniñipirini. Ayináni seyíne re niriro diñi ikwímoariñoi, “Gorixo seáyi e Kiraiso añañami nání nipeyimáná imóniñipi tñi xixeni neaimixiniñárinini.” niriro ikwímoariñoi. ²⁸Xwiýá o nání yayí neainariñipi wái nuriranéná ámá niyoni ikwairirí wirane diñi neñwipémáná urirane yariñwárinini. Ámá Kiraiso tñi ikárinigíáyí rixa yóí imóniñáná xóyá símimañi e éí uráñwaniginiri e yariñwárinini. ²⁹Nioni e yárimíániri ríwí niríkwínimáná aniñi miní yariñini. “Kiraiso xewaniño eñi sixí ayá wí nímixiñipi tñi xixeni e yárimíániri aniñi miní yariñini.” searariñini.

“Yapí seaíwapiyipírixiniri yariñini.” uriñi nánirini.

2 ¹“Seyíne ripi nání nijía oimónípoyi.” nimónarini. “Seyíne nání tñi aña Reodisia ñweáyí nání tñi ámá gí símimañi sini mí minómixigíáyí nání tñi nioni ríwí niríkwíniri aniñi miní ría tñiñ yariñápi nání nijía oimónípoyi.” nimónarini. ²⁻³Ayí tñi seyíne tñi diñi sixí íniro diñi sipí inarigíápimi dání irikwíniñi ikeániro epíría nání e yariñini. Xwiýá yumí rinárininiñi xixeni nijía nimóniróná “Ayí apimi dání amipi mimúróniñwaénéniñi ría imóniñwini?” yaiwipíría nání eni e yariñini. “Xwiýá Gorixoyá yumí rinárininiñi nání —Api Kiraiso nání riniñipirini. Api nání xixeni nijía imónipíría nání yariñini.” searariñini. Diñi émi saímí Gorixo mori diñi eñwiperi eñipi —Api ayá tñiñiniñi imóniñipirini. Api nání ámáyo nijía wimixipaxo wo maríái, sa Kiraisorini. ⁴Ámá wí wigí xwiýá diñi seakinimixipaxí imóniñipimi dání —Api yapí riniñi aí nepa imoarigíápirini. Apimi dání yapí seaíwapiyipírixiniri Kiraiso nání e searariñini. ⁵Nioni seyíne tñi miñweapa neri aiwi diñi seakikayonñini. Seyíne Kiraisomi diñi niwikwíroróná sirí muní ero íyí wiámí yariñigíáyínéniñi imóniño yariñagía nání diñi yayí ninarini.

“Wé searoárininiñiñe eñagi nání piyiniñi ikayíwipi diñi mikwíropani.” uriñi nánirini.

⁶Seyíne nemeróná xwiýá Áminá Kiraisi Jisaso nání riniñipi xámi umíminigíá tñi xixeni ámá o tñi ikárinigíáyí epaxí imóniñipa axípi e éirixini. ⁷E nero Kiraisi Jisaso nání searéwapiyigíápi íkíá pipiñi ná ínimi weariniñipániñi imóniño aña íkíá xwiýá xaíwíyo dání mirinariñipániñi

imóniro Kiraiso náni searéwapiyíáná diñj wikwírogíápi pírániñj diñj sixi íniro o seaiñjpi náni yayí bi onimiápi mé ayá wí ero étrixini.

⁸ Ámá wí piyíñj ikayíwí riniñjpi —Api nepa míkí mayípirini. Ámá wigí diñjyo dáni nérowiápiñiro rariñjpirini. Kiraiso náni riniñjpi mariái, sa ámá omi mixídarigíáyí wigí amipí xixegíni nepa mipimónipaxí imóniñjpi náni riniñjpirini. Api searéwapiyaniro éáná diñj niwikwíroro xídipírixiniri siñwí niyápirómí memepani. ⁹ Ayí ripi náni searariñjini. Gorixo imóniñjpi bi onimiápi mariái, nipini Kiraisomi sixi ínini. Xegí nápimi nipini sixi ínini. ¹⁰ O —Giyí giyí seáyi e nimóniri wíyo umenwearigíáyorani, giyí giyí neni tígíáyorani, niyoni o seáyi e wimóniñjorini. O tñi ikárinigíáyíne eñagi náni Gorixoyá siñwíyo dáni díwí wí miseaikáriní rixa wé searoárinini. ¹¹ O tñi ikárinigíáyíne eñagi náni iyí símí sío wákwínigíáyíne eni imóniñjoi. Nepa wé tñi ámá iyí símí sío wákwínarigíápi náni mirariñjini. Kiraiso iyí símíniñj sío niseawákwiríná sipí oyaneyiniro miñj inagíápi —Api nipikwini mimóniñj xwioxíyo íniñjpirini. Api seawákwiniñjpi náni rariñjini. ¹² Seyíne wayí nimearóná iniigíyo ía seaurímixáná Kiraiso tñi nawíni xwíá weyárinigíáyíneñiñj nimónimáná Gorixo o xwáripáyo dáni owiápinimeaniri wiñjpi náni diñj wikwírogíápi dáni o tñi nawíni wiápinimeagíáyíneñiñj imóniñjoi. ¹³ Seyíne xámi niwialkía nuro sipí yaniro náni miñj inagíápi nixídiro náni ámá anínimixinaniro imónagíáyíne eñagi aiwí Gorixo xegí xewaxo Jisaso tñi diñj niyimiñj tígíáyíne oimónipoyiniri seaimixiñjirini. E neri negí niwialkía wagwápi nipini eni yokwarimí neaiñjirini. ¹⁴ Ayí ripíniñj neríná e neaiñjirini. Iñwí ikaxí eániñjyo dáni riniñj nene wialkiagwápi náni xwiyíá neaxekwímopaxí imóniñjpi Kiraisomi íkiápami yekwiroáraná Gorixo api eni íkiápamíniñj yekwiroáriñjipi dáni anipá imixiñjirini. ¹⁵ O rixa pí pí kwíyí seáyi e nimóniri menwearigíáyorani, neni tígíáyí imónigíáyorani, Kiraiso yoxáipami niperíná eñjipi dáni xopírári niwimáná ámá níni re oyaiwípoyniri, “Gorixo ayo rixa miñj ría wimixáriñjoi?” oyaiwípoyniri wigí siñwí tígíe dáni niméra púñiñj eñjirini.

**“Api api nimusiroríná nipikwini miyariñjoi.”
searáná aríá miwipani.” uriní nánirini.**

¹⁶ Ámá wí seyíne aiwá bi nariñagía siñwí niseaniro “Nipikwini miyariñjoi.” searánarani, iniigí bi nariñagía niseaniro “Nipikwini miyariñjoi.” searánarani, síá xwiogwí o omi Gorixo náni diñj oneaininiri yarigíayo seyíne kikiíá yariñagía niseaniro “Nipikwini miyariñjoi.” searánarani, síá emá siñj wo imónáná yarigíápi mixídarinagía niseaniro “Nipikwini miyariñjoi.” searánarani, Sabaríayo yarigíápi mixídarinagía siñwí niseaniro “Nipikwini miyariñjoi.” searánarani, wí ayí seararigíápi aríá miwipa étrixini. ¹⁷ Ayí ripi náni searariñjini. “Api api neróná

Gorixomi píráníñí xídariñoi.” seararigíápi áamá náo baríná onapámigí inariñípiniñí imónini. Api nipini, ayí nene Kiraiso neaiñípi náni mí neaóriniñíápi imónini. Ná, ayí Kiraiso xío imónini. ¹⁸ Áamá wí “Gorixo nene náni yayí owinini oyaneyiniríná ripini epaxírini.” yaiwiarigíápipimi seyíne mixídipa yariñagía siñwí niseanro “Nípikwini miyariñoi.” niseanro “Sewaniñíyíne siyikwípiániñí mimónariñoi. Aníñajíyo ínimi niwuriñiro yayí mumeariñoi.” searánáyí, aría miwí sa paimimí éfrixini. Ayí ripi náni searariñini. Áamá e niriro yariñíyí nepa siñwí náyi tñi miwinipa nerinípimi dání e riro míkí ná mimóniñáná nipikwini mimóniñí wigí xwioxíyo íniñípimi dání wárixá imóniro yariñíyí eñagi náni searariñini. ¹⁹ Xwiyíá Kiraiso náni riniñí ripi eni íá mixirariñíyíriñi. Nene oyá siyikí imóniñwaéne waráí imóniñwini. O miñíyí imónini. Waráí xómíñí tñi wikí tñi eñagi náni xegí imóniñípa imóniñírini. Waráí miñíyimi íkíkí winiñagi náni xwé nimóga wariñípa oyá siyikí imóniñwaéne axípi omi miñíyimiñiñí íkíkí winiñwá eñagi náni Gorixoyá diñíyo dání nimóga wariñwini.

“Mipimónipaxí imóniñípa náni riniñípi aría miwipani.” uriní nánirini.

²⁰⁻²¹ Kiraiso niperíná seyíne o tñi ikárinigíyíne eñagi náni o tñi nawíni piyí egíyíneñiñí imónigíárini. Ayináni seyíne áamá omi mixídariñíyí wigí amípí xixegíni nepa mipimónipaxí imóniñípa náni riniñípimi sini xídipaxíyíne mimóniñoi. Seyíne e imóniñagía náni arire nero áamá omi mixídariñíyí tñi nawíni nimóniróniñí wigí rariñíápi yariñoi? Iñwí ikaxí “Api íá mimaxiripani. Api gígí bi mepani. Api amáfí aí mirónipani.” rariñíápi aría bi miwipani. ²² Ayí ripi náni searariñini. Iñwí ikaxí apíniñí niriña uñípi, ayí sa amípí aiwáraní, iniigíraní, nene niníáná anipá imónariñípini náni rinini. Api sa ámayí érowiápiñiro éwapíñiro yariñíápirini. ²³ Api rariñíyí Gorixomi yayí owianeyiniríná diñí áamá moarigíápipini xídiro “Gorixo diñí níá owininiri áamá wiwaníñíyí siyikwípiániñí oimónipoyi.” riro “Gorixo diñí níá owininiri iwaní oeánipoyi.” riro neróná nepaxiñí pákíní nimóniro rariñí eñagi náni seyíne xerwí re waiwipaxírini, “Áamá e rariñíyí nepa diñí émí saímí nimoro ría rariñoi?” Xerwí e waiwipaxí aiwi wigí rariñíápi, ayí áamá níxídiriñípimi dání íwí náni íeapá winariñípimi wí pírí rakipaxí mimóniñípirini.

“Aníñami imóniñípi náni diñí ikwírófrixini.” uriní nánirini.

3 ¹ Gorixo Kiraiso xwáripáyo dání owiápinimeaniri ámi siñí niwimixiríná seyíne eni axípiñiñí siñí seaimixiñí eñagi náni siwí aníñami dání — Aníñami seáyi eyí Kiraiso seáyi e nimóniri Gorixoyá wé náúmíni ñweañerini. Siwí nañí e dání imóniñípi arige imónaníwárianiri aníñí miní néra úfrixini. ² “Seyíne siwí sipí xwíá tíyo imóniñípi náni diñí miwíró aníñami imóniñípi

náni diŋj íkwíróírixini.” searariŋini. ³Ayí ripi náni searariŋini. Kiraiso péaná seyíne eni o tñi nawíni ikárinigiáyíne eŋagi náni rixániŋj pegiárini. Ámá niperiná xámi yagiápi píni wiárarigiápa seyíne Kiraiso tñi rixániŋj pegiáyíne eni axípi nero xámi yagiápi píni wiárigiá eŋagi náni searariŋini. Ayí diŋj niyimiŋj seyíne Kiraiso tñi imónigiápi — Api Gorixo tñi axí e imóniŋjipirini. Api ámá siŋwí niseaniróná anopasinipaxí imóniŋagi náni eni searariŋini. ⁴Kiraiso — O diŋj niyimiŋj nene imóniŋwápi mǎkí ikiŋorini. O rixa siŋjáni piaumimí ináná seyíne eni o tñi imónigiápi piaumimí inipíríarini. Piaumimí niniróná Kiraiso níkíniri seáyi e imóniŋjpa seyíne eni axípi nimóniro yaríná ámá siŋwí miseanopasiní mí seómixipíríarini.

“Sipípi mepa érixini.” uriŋj nánirini.

⁵Ayináni “Gí wé sikwí amipi, ayí íwí api náni ría imónini?” niyaiwiri xe íwí api náni miŋj oninirini mé “Api eminiri náni rixa ámá piyiniŋj imóniŋáoniriani?” yaiwinírixini. E niyaiwiniro íwí minipa érixini. Piaxí weániŋpaxí imóniŋjpi mepa érixini. Íwí náni miŋj minipa érixini. Íwí náni íeapá seainariŋjpi xe oneainirini siŋwí miwinipa érixini. Ayá tñj wí minimúropa oeniri mepa érixini. Ámá ayá tñj bi minimúropa oeniri yariŋiáyi Ŋwíá nipa imóniŋo náni diŋj mamopa nero api nánini neróná wigí ŋwíániŋj nimixiro yariŋiá eŋagi náni searariŋini. ⁶Ayí ripi náni “Api api mepa érixini.” searariŋini. Ámá píŋj niwíakiro e yariŋiáyo Gorixo píŋj umamoníá eŋagi náni searariŋini. ⁷Enjá seyíne Gorixomi píŋj wiákiariŋiáyi tñi níkumixiniro neróná seyíne eni e néra wagiárini. ⁸Seyíne xámi axípi e néra wagiáyíne aiwi agwi ríná ripi ripi wí mepa érixini. Wikí móninipa érixini. Wikí ría ápiáwíniŋj miwénipa érixini. Únúniŋj miwikáripa érixini. Xwiyiápai miŋwiráripa érixini. Ikayíwí mumearipa érixini. ⁹Yapí mirinipa érixini. Ayí ripi náni “Api api mepa érixini.” searariŋini. Seyíne xámi imónagiápi emi nimoro sini e nimóniróná sipi yagiápi píni niwiárimáná ¹⁰ámi rixa siŋjyíne imónigiá eŋagi náni searariŋini. Diŋj siŋj agwi ríná seyíne imónigiápi Gorixo xewaniŋo imóniŋjpi náni xixeni niŋjá oimónipoyiniri seaimixiŋjirini. Api diŋj xío imóniŋjpa oimónipoyiniri sini aniŋj axipini ámi bi tñi bi tñi niseaimixa warini. ¹¹Ámá diŋj siŋj tigiáyíne niseaimixa wariŋagi náni wiyíne Girikiyínérani, wiyíne Judayínérani, ayí ananirini. Wiyíne iyí símí síó wákwínigiáyínérani, miwákwínigiáyínérani, ayí eni ananirini. Wiyíne émáyínérani, kinixiyínérani, ayí eni ananirini. Wiyíne xináíwayínéniŋj nimóniro omiŋj wiariŋiáyiŋérani, omiŋj wiipíri náni áxeŋwarí minigiáyínérani, ayí eni ananirini. Ná bini xwé imóniŋjpi, ayí Kiraiso tñi ikárinigiápirini. O nípimini seáyi e wimóniŋorini. Pí pí ámá imónigiápi omi diŋj niwíkwíroróná anani o tñi ikárinipaxíri.

“Xixe diŋj sipi inírixini.” uriŋj nánirini.

¹²Gorixo íá yiyamiximí seairi ámá nioniyá oimónipoyiniri seaimixiri diŋj sixí seayiri egiáyíne eŋagi náni ripi érixini. Wíniyo

wá wianíírixini. Diñí sipí eni wíírixini. Seáyi e seáyi e mimóní siyikwípiayínéniñí imóníírixini. Niyapenimáná uríírixini. Anjañí murí xe óí oneaimópoyiniri éírixini. ¹³Segíyí pí pí seaikáriagía aí seyíné eni xixewiámí miwipa éírixini. Segí wo sipí seaikáriagi nání xwiýíá umearipaxí eñánáyí, yokwarimí wiíírixini. Ámináo yokwarimí seaiñípa axípi e wiíírixini. ¹⁴Api api nipini nero aiwi anjipaxí epaxípi, ayí rípirini. Xixe diñí sixí yiníírixini. E neróná pírániñí nawíni kumixinipíríá eñagi nání searariñini. ¹⁵Kiraiso seyíné píyíá seawíriniñí eñagi nání omí wí pírí miwiaíki segí wíniyí tñi pírániñí níkumixiniro ñweáírixini. Seyíné Kiraisoyá siyikí imónigíá wíniyí tñi níkumixiniro pírániñí onweápoyniri íá seaumiriñíyíné eñagi nání searariñini. Íníná Gorixomi yayí wiayíírixini. ¹⁶Xwiýíá Kiraiso nání riniñípi seyíné aumaúmí iníírixini. Segí soñí tñi seaní tñi api níriróná nírewapániro íkwairirí iniro yarigíápimi dání xwiýíá o nání riniñípi aumaúmí iníírixini. Soñí tñi seaní tñi api níriróná manjápáni mirí “Gorixo e neaiñííráni?” niyaiwiro omí xwioxí aí tñi nífá niseainiri yayí wíírixini. ¹⁷Pí pí seyíné nírirónáraní, pí pí nerónáraní, “Áminá Jisasomi ínimi wuríniñwaéneríani?” niyaiwiro ámá xíoyáyí epaxípiñi éírixini. E neróná “Kiraiso nene nání e neaiñííráni?” niyaiwiro ápo Gorixomi yayí wíírixini.

Xiepiwami tñi xiagwowami tñi uriñí nánirini.

¹⁸Apixíwayíné, segí oxowami simañwíyóniñí wurííírixini. Áminá Jisaso tñi ikárinigííwayíné e epaxí eñagi nání searariñini. ¹⁹Oxoyíné segí apixíwa nání diñí sipí seaíwinigini. Naririmí miwipa éírixini.

Niaíwíyo tñi xanowami tñi uriñí nánirini.

²⁰Niaíwíyíné, segí inókíwa ápowa sekaxí pí pí searáná aría yímigí wíírixini. E neróná Ámináo yayí winipaxípi yariñagía nání searariñini. ²¹Xanowayíné, segí niaíwíyo éwapiyí níwiríná míxiniñí miyomixípa éírixini. Segí niaíwíyí diñí aniñí rakiárinipírixiniri searariñini.

Bosowami tñi omiñí wiirigíáyo tñi uriñí nánirini.

²²Xináíwayínéniñí nimóniro omiñí wiirigíáyíné, segí bosowa pí pí searáná aría níwiro xixeni éírixini. Segí bosowayá siñwí anigé dánini e éírixiniri misearariñini. Omiñí yarigíáyí yapi nimóniro wiepísarigíápa mé “Ayá tñi oyaneyi.” niyaiwiro éírixini. Seyíné Ámináomi wáyí wiirigíáyíné eñagi nání searariñini. ²³Omiñí wiirigíáyíné pí pí nerínáyí “Ámá nánini riwiirariñwini?” niyaiwiro úrapí yarigíáyí yarigíápa mé “Áminá Jisaso nání riwiirariñwini?” niyaiwiro pírániñí yarigíáyí yarigíápa seyíné eni e nero ayá tñi éírixini. ²⁴Seyíné nijáraní. Ámá wí maríái, Áminá Jisaso yayí niseaimori Gorixo “Naní e niseaiimíáraní.” ráriñípi

seaiiníá eɗagi náni searariɗini. Bosí seyíné wiirigíó, ayí Áminá Kiraiso eɗagi náni searariɗini. ²⁵ Giyí giyí sipíni néra nurináyí, Gorixo pirí numamoríná mimearó sipí ayí éfápi t́ni xixeni pirí umamoníá eɗagi náni searariɗini.

4 ¹ Bosoyíné, “None eni bosí aɗinami wo t́ɗwáonerfani?” niyaiwiro segí inókiwániɗí nimóniro omiɗí seaiarigíáyo neɗwipero pírániɗí numeríná epaxípini t́ni xixeni umérixini.

“Gorixomi rixiɗí neauriyírixini.” uriní nánirini.

² Seyíné Gorixomi rixiɗí nuriróná xaíwí niwakirímixinimáná nira úrixini. E neróná diɗí yaíkiá nimómáná mepa ero yayí wiro érixini. ³ E neróná none náni eni rixiɗí neauriyírixini. None xwiyíá Kiraiso náni eɗíná dání ínimi imónagípi —Xwiyíá api nioni gwí ɗweaɗápirini. Api ámáyo woákíki wianíwá náni “Óí wimoi.” nuriro rixiɗí neauriyírixini. ⁴ “‘Nioni api niriɗíná siɗáni áwaní uríimigini.’ nimónariɗípi t́ni xixeni urimá náni rixiɗí neauriyírixini.” searariɗini.

⁵ Seyíné ámá Jisasoyá siyíki mimónigíáyí t́ni niɗwearóná diɗí émi saímí nimómáná érixini. Íníná ayí t́ni niɗwearóná “Ayí Gorixo náni diɗí mopaxíná rínárfani?” niyaiwiro wé róniɗípini érixini. ⁶ Íníná xwiyíá nuriróná segí xwiyíá aiwáyo saxí nimoróná awí yariɗípániɗí nimixiro urírixini. E neróná ámá seyíné yariɗí sealíá ayí ayo “Api uripaxírini.” niyaiwiro xixeni uripaxí imóniɗípi t́ni uripírírini.

Tikikaso t́ni Onesimaso t́ni náni uriní nánirini.

⁷ Nioni nikárarigíá nipini Tikikaso —O negí niriɗímeá diɗí sixí uyiɗwáorini. Diɗí uɗwiráripaxí imóniɗípini yariɗorini. Ámináo náni wáí urani náni gwí móniɗwá worini. O nibiri áwaní seariniárini. ⁸ Ayí ripi náni uowárenapariɗini. O niseaímeari áwaní searána seyíné “Porowami wímeaariɗípi, ayí apírani?” yaiwiro diɗí wíá seaóniri ení náni uowárenapariɗini. ⁹ Nioni Tikikasomi t́ni Onesimasomi t́ni —O eni negí niriɗímeáyí imóniɗí worini. Diɗí uɗwiráripaxí neaiariɗorini. Negí diɗí sixí uyiɗwáorini. Omi eni segí t́ɗí e náni uowárenapariɗini. Awaú amípí none re neaimónariɗípi náni áwaní searipisíi.

“Ámá tiyí yayí seaiwárenapariɗoi.” uriní nánirini.

¹⁰ Arisitakaso —O nioni t́ni nawíni gwí ɗweagwíorini. O seyíné yayí seaiwárenaparini. Mako —O Banabasomi xoayorini. O eni yayí seaiwárenaparini. O seyíné t́ɗí e rémónapánáyí, o náni nioni xámi bi seariɗá eɗagi náni yayí wírixini. ¹¹ Jisaso —O yoí bi ámi Jasitasoyi wíriniɗorini. O eni yayí seaiwárenaparini. Judayí níni eɗagi aiwi Porone ámá wí eni Gorixomi diɗí niwíkwíroriɗípimi dání oyá xwioxíyo ɗweárixiniri wáí rimeariɗwápa axípi nero gwí móniɗwáwa, ayí waú

woni awarini. Ripi eni nioni diŋi wía nónigíawarini. ¹²Epapiraso —O segíyí worini. Jisasi Kiraisoyá xináíniŋi nimóniri omiŋi wiariŋi worini. O eni yayí seaiwárenaparini. O Gorixomi xwiyiá ririmí niwiríná símí nixeadípéniri seyíne náni aniŋi miní rixiŋi seauriyariŋirini. Seyíne yóí imóniro “Gorixo áamá xíoyá e érixiniri wimónariŋipi, ayí apírani?” yaiwiáiro érixiniri rixiŋi seauriyariŋirini. ¹³O seyíne náni tñi sérixímeá imónigíá Reodisia ŋweáyí náni tñi sérixímeá imónigíá Xiraporisi ŋweáyí náni tñi íkíniŋi sipí wiariŋagi siŋwí winariŋá eŋagi náni searariŋini. ¹⁴Ruko —O dokitá nene diŋi sixí uyiŋwáorini. O eni yayí seaiwárenaparini. Dimaso eni yayí seaiwárenaparini.

Poró yayí niwiowáriríná uriŋipi nánirini.

¹⁵Seyíne segí sérixímeániŋi imónigíá Reodisia ŋweáyo “Poró yayí seaiwárenapiŋoi.” urípoi. Nibaími tñi áamá Jisasiyá siyikí imónigíá íyá aŋiwámi awí eánariŋíayo tñi eni “Poró yayí seaiwárenapiŋoi.” urípoi. ¹⁶Seyíne payí nioni eaariŋá rina segí awí eániŋie dáni íá niroárimáná ámi Jisasiyá siyikí imónigíá Reodisia ŋweagiáyí eni íá orópoyiniri wírixini. Payí nioni ayí náni eána seyíne eni nurápiro íá rórixini. ¹⁷Akipasomi re urírixini, “Joxi Ámináo tñi ikárinixoxi eŋagi náni o e érixiniri rirípeaŋipi náni diŋi nimori xixeni nipini yárixini.” urírixini. ¹⁸Poroni niwanixoni gí wé tñi yoparí ripi yayí niseaiwárenapiri eaariŋini. Nioni náni “O sini gwí riŋweani?” niyaiwiro Gorixomi rixiŋi nuriyírixini. “Gorixo wá seawianíwinigini.” nimónarini.